

moderamine *Dannbaueri* disputante, ipse Præses fateri nullus dubitaverit, sibi ambiguum esse, utrum in palæstra disputatoria Præsidis, an Respondentis sustinuerit partes. Adeò in sui admirationem rapuerat summum Virum, qvi & ea de causa, ad Professionem Argent. in Acad. vocatus, *Clotzium* itineris elegit comitem, de quo mediocre nihil sperabat. Promiserat id Præceptoris *Clotzius*, sed postea renuit, non ex contemptu fortè viri de se meritissimi; sed arcano haud dubiè summi Numinis consilio, quod Rostochiensi eum, de qua posthac optimè meretur, Academiæ destinaverat. Hanc itaque Academiam, rara omnis generis scientia instructissimus, 1627. æt. anno 21. ingressus, suavissimè à Doctoribus susceptus adque gradum Magisterii eodem anno invitatus est. Quem eò quidem libentius sibi conferri passus est, quo cupidine flagrabat majori, instituendis Collegiis & Dispp. publ. de studiosa juventute merendi. Magister itaque Doctoratus Phil. honoribus, suorum in Academiam meritorum fecit initium, atque confluentibus undique Studiosis modò Methaphysicas aperuit scholas, modò Physicas, jam pro desiderio audientium Logicam, jam vicissim Ethicam professus. Disputationibus præterea publ. frequenter institutis omnigenam adeò prodidit eruditionem omniumque in se convertit oculos, ut à Reip. Rost. Proceribus ad Archi-Diaconatum primò Jacob. 1629, & 1632. ad Professionem Theol. Æt. 26. vocaretur, habitaque Disp. inaug. triennio post Doctoris titulo, insignibus & honoribus augeretur. Quo ex tempore adeò crevit *Clotzius* meritorum, Lectionibus publicis privatisque ac Dispp., nec non Magnifico Magistratus Academicus (quod sustinuit Anno 1633. semestr. hyb.) ac Decanatus munere præstitorum gloriâ, ut Aulas Regum Principumque, varias itidem Academias fama Clotziana impleret. Delectatus cum primis fuit studio Exegetico, ad qvod Theol. Cultores strenuè invitavit. Testari id possunt variæ Dispp. ad illustria Script. S. loca propositæ, imò, si nil aliud suppeteret, unus solusque *de Angelolatria Tractatus* satis prolixus (tribus enim ferè Alphab. constat) maximâ *ἀκριβείᾳ* elaboratus, apertissimum illius rei documentum præbere potest. Propositionum fortè sibi habuerat à collata in eum profes-